

ADDENDA AO CONVENIO DE COLABORACIÓN ENTRE A CONSELLERÍA DE EMPREGO, COMERCIO E EMIGRACIÓN E O CONCELLO DA CORUÑA PARA A ACREDITACIÓN DA FORMACIÓN PARA O EMPREGO IMPARTIDA POLO SERVIZO MUNICIPAL DE EMPREGO E EMPRESA DO CONCELLO DA CORUÑA

Santiago de Compostela, na data da sinatura dixital

REÚNENSE

Dunha banda, Zeltia Lado Lago, directora xeral de Formación e Cualificación para o Emprego, nomeada polo Decreto 164/2020, do 24 de setembro (DOG núm. 195, do 25.09.2020), actuando en nome e representación da Xunta de Galicia en virtude do artigo 3.2 da Orde do 29 de setembro de 2021 sobre delegación de competencias (DOG núm. 195, do 08.10.2025).

Doutra parte, Inés Rey García, na súa calidade de alcaldesa do Concello da Coruña, elixida polo Pleno do Concello en sesión celebrada o 17 de xuño do 2023, en representación legal da Corporación, con CIF P1503000J e enderezo en Praza María Pita, 1, 15001 A Coruña.

Ambas as dúas partes recoñécense coa capacidade xurídica para actuar no presente acto, e:

EXPOÑEN

Primeiro. O día 22 de abril de 2025 asinouse, en Santiago de Compostela, o convenio de colaboración entre a Consellería de Emprego, Comercio e Emigración e o Concello da Coruña para a acreditación da formación impartida no marco do proxecto EFESO CORUÑA, cofinanciado polo Fondo Social Europeo Plus, que contempla o desenvolvemento de itinerarios de formación e inserción profesional dirixidos a persoas desempregadas non ocupadas, pertencentes a colectivos en situación ou en risco de exclusión social e que están vinculados aos certificados profesionais e que establecen o termo municipal da Coruña como ámbito xeográfico de implantación.

Este proxecto finánciase a través da Resolución do 26.11.2024, da Dirección Xeral de Cooperación Autonómica e Local, do Ministerio de Política Territorial e Memoria Democrática, publicada no BOE núm.: 287 do 28.11.2024 que resolve a convocatoria para a selección de proxectos de formación para o emprego promovidos por entidades locais financiados polo Programa de Emprego, Educación, Formación e Economía Social, do Fondo Social Europeo Plus (FSE+), do período de programación 2021-2027.



Segundo. A cláusula novena do convenio de colaboración establece que o dito convenio estará vixente dende o día seguinte á súa sinatura e ata o 31 de decembro de 2025, sempre que non medie denuncia dalgunha das partes formulada de forma fidedigna con tres meses de antelación, ou se dea por rematado en calquera momento por mutuo acordo entre as partes, previa comunicación polo menos cun mes de antelación, ou por causa maior.

De ser necesario, asinaranse as correspondentes addendas de actualización das actividades formativas, así como a prórroga ou prórrogas da duración do convenio, que non suporán, necesariamente, salvo que o recollan expresamente, denuncia ou modificación do mesmo.

Terceiro. No punto noveno do expositivo do convenio, inclúense as accións formativas a desenvolver no proxecto EFESO CORUÑA e se indica que o número de edicións dos itinerarios poderá verse reducido en función das necesidades de modificación do proxecto, sempre previa aprobación do Ministerio de Política Territorial e Memoria Democrática, como Organismo Intermedio para a xestión dos proxectos subvencionados a través do FSE+.

Cuarto. Na cláusula primeira do convenio de colaboración establécese que o obxecto deste convenio é recoller as características e condicións que debe reunir a formación proposta polo Servizo Municipal de Emprego e Empresa do Concello da Coruña, para que o alumnado participante que finalice con avaliación positiva todos os módulos formativos reciban os correspondentes certificados profesionais. Así mesmo, establécese que as accións formativas realizaranse de forma presencial e incluírán todos os módulos formativos que integran os certificados profesionais, segundo as especificacións recollidas nos reais decretos polos que estes se regulan.

Quinto. Na cláusula segunda do convenio establécense as obrigas do concello da Coruña que engloban o desenvolvemento das accións formativas recollidas no expoñendo noveno do dito convenio, que comprenden:

1. Comunicar ao Departamento Territorial da Consellería de Emprego, Comercio e Emigración correspondente, con carácter previo ao inicio das accións formativas, as entidades ou empresas contratadas para impartilos, o número de prazas e o nome, teléfono e correo electrónico dunha persoa de referencia en cada unha das devanditas entidades.

2. Empregar a aplicación informática SIFO para a xestión e seguimento das accións formativas, na que se deberá introducir, nos prazos que correspondan, a documentación esixida pola Orde que regula as accións formativas dirixidas a persoas traballadoras desempregadas da Comunidade Autónoma de Galicia vixente no momento do desenvolvemento das accións formativas. Non poderá comezar ningunha acción formativa que non conte coa validación previa do persoal técnico da unidade administrativa competente, a través da aplicación informática.



3. Seleccionar ao alumnado a través de selección directa ou mediante a oferta de formación do Servizo Público de Emprego de Galicia. De ser o caso, para o acceso ao certificado profesional de nivel 2, o alumnado deberá acreditar o cumprimento dos requisitos académicos establecidos no artigo 75 do Real Decreto 659/2023, de 18 de xullo, polo que se desenvolve a ordenación do Sistema de Formación Profesional (en adiante, Real Decreto 659/2023), sen prexuízo dos previstos na disposición adicional quinta. Calquera que sexa a metodoloxía de selección elixida, deberá comunicarse a listaxe do alumnado á oficina do Servizo Público de Emprego de Galicia correspondente para que poida validar o cumprimento dos requisitos do alumnado seleccionado.

4. Informar ao alumnado do alcance da formación e de que esta conduce á obtención dun certificado profesional, así como dos requisitos necesarios para poder participar na acción formativa. Da comunicación desta información deberá quedar constancia mediante escrito asinado polo alumnado, que se incorporará ao expediente electrónico recollido en SIFO.

5. Expoñer no taboleiro de anuncios do centro e, no seu caso, na páxina web do centro o programa completo da acción formativa, os dereitos e obrigas do alumnado, así como a relación do persoal docente, as datas de impartición e o horario da acción formativa.

6. Subscribir os convenios ou acordos coas empresas nas que se realizará a formación en empresa, que serán postos en coñecemento das persoas que realizan as prácticas, nos que deberán describirse os seguintes aspectos:

- contido
- duración, lugar de realización e horario
- sistema de titorías para o seguimento e avaliación

7. Contratar un seguro de accidentes para o alumnado, que cubra tanto os riscos que poden ter durante o curso como os do traxecto en concepto de desprazamento ao lugar das clases teóricas, prácticas, visitas didácticas, titorías e probas presenciais. A súa duración abarcará o período do curso, incluíndo expresamente a formación en empresa, e deberá ter a seguinte cobertura mínima:

- no caso de morte: 60.000€
- no caso de invalidez permanente: 60.000€
- asistencia médico-farmacéutica: durante un ano a partir do sinistro. Non se admitirán pólizas con franquías.

8. Contratar unha póliza de responsabilidade civil para facer fronte aos riscos que puidesen derivarse para os bens e as persoas cando se realicen prácticas en empresas. Non se admitirán pólizas con franquías.



9. Dispoñer dun sistema de control de presenza para o seguimento e control do alumnado e do persoal docente compatible co sistema establecido polo Servizo Público de Emprego de Galicia.

10. Someterse ás actuacións de supervisión e control que, en calquera momento, poidan acordar os servizos competentes da Consellería de Emprego, Comercio e Emigración, tanto no relativo ao desenvolvemento das accións formativas como á súa xestión e tramitación administrativas, así como someterse ás actuacións de avaliación, seguimento e control, internas e externas.

11. Desenvolver a formación recollida con medios económicos procedentes do Concello da Coruña ben a través de recursos propios do mesmo ou da axuda recibida polo Programa de Empleo, Educación, Formación y Economía Social do Fondo Social Europeo Plus (FSE+).

12. Finalizada a acción formativa deberán darse de alta en SIFO os resultados individuais obtidos polas persoas alumnas e solicitar os diplomas, que emitirá a Dirección Xeral de Formación e Cualificación para o Emprego, previa verificación do cumprimento dos requisitos por parte do alumnado participante. Ademais, solicitaranse os correspondentes Certificados Profesionais.

Sexto. Na cláusula terceira do convenio inclúense os compromisos da Consellería de Emprego, Comercio e Emigración que comprende a obriga de expedir os correspondentes certificados a quen o solicite e demostre ter superado os módulos correspondentes ao devandito certificado, unha vez comprobado o cumprimento dos requisitos esixidos neste convenio e na normativa reguladora dos certificados profesionais.

En ningún caso, a Consellería de Emprego, Comercio e Emigración adquirirá ningunha responsabilidade respecto daquelas persoas que puidesen participar na formación sen reunir os requisitos de acceso esixidos polos certificados profesionais, ou se a formación se impartise sen cumprir os requisitos propios do certificado; nin ningún compromiso ou responsabilidade económica derivada do desenvolvemento e/ou xestión da mesma.

En aras de coordinar esforzos co Concello da Coruña e optimizar os recursos públicos no eido da formación para o emprego, a Consellería de Emprego, Comercio e Emigración, a través das oficinas do Servizo Público de Emprego de Galicia, suspenderá temporalmente a demanda de emprego ás persoas participantes soamente naquelas accións formativas previstas no proxecto EFESO CORUÑA que comporten a formación a acreditar obxecto deste Convenio, e mentres que as ditas accións formativas estean a desenvolverse.

Co obxectivo de solicitar a suspensión da demanda de emprego temporal das persoas beneficiarias, o Concello da Coruña enviará ás oficinas do Servizo público de Emprego,



os correspondentes listados das persoas admitidas unicamente naquelas accións formativas previstas no proxecto EFESO CORUÑA que comporten a formación a acreditar obxecto deste Convenio e que se vai desenvolver para a obtención dos Certificados de Profesionalidade recollidos no presente convenio. En todo caso, o Concello da Coruña indicará na comunicación ás oficinas de emprego: o nome do proxecto, o nome da acción formativa, os datos das persoas participantes e datas de inicio e finalización das accións.

O Concello da Coruña é o responsable de informar ás persoas participantes nas accións formativas do proxecto sobre a necesidade de acudir individual e persoalmente ás oficinas do Servizo Público de Emprego de Galicia que lles corresponda, para activar de novo a súa demanda de emprego, unha vez finalizada a súa participación na acción de formación do proxecto.

Sétimo. A cláusula novena do convenio de colaboración establece que: *"De ser necesario, asinaranse as correspondentes addendas de actualización das actividades formativas, así como a prórroga ou prórrogas da duración do convenio, que non suporán, necesariamente, salvo que o recollan expresamente, denuncia ou modificación do mesmo"*.

Oitavo. Que procede a introdución de modificacións, dando así flexibilidade na elección das accións formativas .

Consecuentemente co exposto, as asinantes, na representación que ostentan, subscriben a presente addenda a cuxo efecto,

ACORDAN

Primeiro. Actualizar as actividades, modificando o expoñendo Noveno relativo á proposta formativa do Concello da Coruña, a través do Servizo Municipal de Emprego e Empresa, para adaptar o proxecto EFESO CORUÑA á Lei Orgánica 3/2022, de 31 de marzo, de ordenación e integración da Formación Profesional; ao Real Decreto 659/2023, de 18 de xullo, polo que se desenvolve a ordenación do Sistema de Formación Profesional e ao Real Decreto 658/2024, de 9 de xullo, polo que se modifica o Real Decreto 132/2010, de 12 de febreiro, polo que se establecen os requisitos mínimos dos centros que impartan as ensinanzas do segundo ciclo da educación infantil, a educación primaria e a educación secundaria, e o Real Decreto 659/2023, de 18 de xullo, polo que se desenvolve a ordenación do Sistema de Formación Profesional, establecéndose que as persoas que inicien a súa formación en empresa ou organismo equiparado, deben ter adquiridas as competencias relativas aos riscos específicos e medidas de prevención de riscos laborais nas actividades profesionais correspondentes ao perfil profesional, segundo se requira na normativa vixente en materia de prevención de riscos laborais.

Para dar cumprimento a esta normativa, a Consellería de Emprego, Comercio e



Emigración, incorporou en todos os Certificados Profesionais unha acción de formación en prevención de riscos laborais de 60 horas de duración, a impartir antes de realizar a formación en empresa.

O Real Decreto 659/2023 establece no seu artigo 71 que a formación en empresa terá unha duración de entre o 25 e o 35% da duración total prevista do certificado profesional, e incluírá entre o 10 e o 20% dos resultados da aprendizaxe dos módulos profesionais que desenvolvan formación vinculada a estándares de competencia do Catálogo Nacional de Estándares de Competencias Profesionais.

A Consellería de Emprego, Comercio e Emigración reflectiu estas modificacións incrementando un 25% as horas de formación en empresa en réxime xeral en todos os certificados profesionais, minorando nesa mesma porcentaxe as horas de formación específica. Este feito afectou directamente á xestión dos certificados profesionais do proxecto EFESO CORUÑA, incluídos no convenio para a súa acreditación.

Con carácter previo, as modificacións realizadas no proxecto EFESO CORUÑA foron aprobadas por resolución do Ministerio de Política Territorial e Memoria Democrática o 10 de setembro de 2025, de xeito que o orzamento do proxecto viuse tamén minorado, quedando modificado o punto Noveno da parte expositiva do convenio, no relativo ao custo total elixible do proxecto, que actualmente é de 3.170.105,83 €, cunha achega municipal (40%) de 1.268.042,33 € e un financiamento do FSE+ (60%) de 1.902.063,50 €.

Segundo. Modificar os Certificados Profesionais do proxecto EFESO CORUÑA recollidos no punto noveno da parte expositiva do convenio nos seguintes aspectos:

- Suprimir as dúas edicións do certificado de Transporte sanitario (SANT0208)
- Suprimir as dúas edicións do certificado de Socorrismo en espazos acuáticos naturais (AFDP0209)
- Incluír un módulo formativo en materia de prevención de riscos laborais de 60 horas (código FCOXXX26) en todos certificados profesionais.
- Modificar as horas da formación específica e da formación en empresa dos certificados profesionais, de acordo ao establecido pola Consellería de Emprego, Comercio e Emigración, diminuindo as horas de formación e incrementando as horas de prácticas, pero mantendo inalterable o número total de horas de cada certificado profesional, ás que se suman as 60 horas de prevención de riscos laborais.



Terceiro. Substituír o cadro de accións recollidas no punto noveno do expositivo do convenio polo seguinte:

Denominación e código do certificado profesional	Nivel cualificación	Número de edicións	Horas PRL	Horas contidos específicos	Horas formación en empresa
Operacións básicas de cociña (HOTR0108)	1	3	60	262	88
Operacións básicas de restaurante e bar (HOTR0208)	1	4	60	210	80
Atención sociosanitaria a persoas dependentes en institucións sociais (SSCS0208)	2	4	60	337	113
Actividades auxiliares de almacén (COML0110)	1	5	60	157	53
Actividades auxiliares de comercio (COMT0211)	1	5	60	202	68
Operacións auxiliares de servizos administrativos e xerais (ADGG0408)	1	3	60	322	108
Servizos auxiliares de perruquería (IMPQ0108)	1	3	60	210	120

Cuarto. Prorrogar a duración do convenio vixente inicialmente ata o 31 de decembro de 2025, ata o 30 de xuño de 2027, data de finalización da execución do proxecto EFESO CORUÑA, tal e como se acordou o pasado 12 de setembro de 2025 pola dirección xeral de Cooperación Autonómica e Local do Ministerio de Política Territorial, en base ao disposto no apartado Decimoquinto da Convocatoria 2023 de axudas financiadas polo Programa de Empleo, Educación, Formación e Economía Social do Fondo Social Europeo Plus (FSE+), e no artigo 4.1.n) do Real Decreto 273/2024 do 19 de marzo, polo que se desenvolve a estrutura orgánica básica do Ministerio de Política Territorial e Memoria Democrática.

Quinto. O resto de cláusulas do convenio suscrito permanecen inalterables e esta addenda rexeráse polas condicións estipuladas no convenio do que trae causa, formando parte integrante do mesmo.

E, en proba de conformidade de canto antecede, asinan este documento, na data da sinatura dixital.

A directora xeral de Formación e
Cualificación para o Emprego

A Alcaldesa do Concello da Coruña

Zeltia Lado Lago

Inés Rey García

